



नेपाल संवत् सीडीओयात अमान्य नेवाःत सामाजिक सञ्जालय् तक्यनाचन

• लहना संवाददाता

संविधानं म्हमसिउगु जिल्ला प्रशासन कार्यालयं नेपालभाषाया संघसंस्था दर्ता यायगु भवलय् नेवाः नां व नेपाल संवत तयातःगु संस्था दर्ता मयायगु यानाच्वंगु दु। सिडिओ कार्यालयं संघसंस्थां तयाःगु नेवाः नां हिलेगु लिसे नेपाल संवत तयातःगु संस्था तकं दर्ता मयायगु नीति कयाच्वंगु सीदुगु दु।

थ्वहे भवलय् येंया ओम बहाःया 'ॐ बहाः त्वाः खलः मिसा पुचः' दर्ता यायगु वंगु भवलय् नेपाल संवत तयाः दर्ता याःगु खःसा दर्ता यायत सिडिओ कार्यालय माने मजुगु खः। संस्थाया लोगोय् नेपाल संवत तल धकाः सिडिओ कार्यालयं नेपाल संवत लिकाया जक दर्ता याःगु खः।

संस्थाया अध्यक्ष सजनी महर्जनया कथं न्हापा लोगोय् 'विक्रम संवत् २०८१ व नेपाल संवत १९४४' तयाः संस्था दर्ता यायत स्वःगु खः। तर नेपाल संवत लिकायाः विक्रम संवत जक तयाः दर्ता याःगु खँ वय् कलं कनादीगु दु।

नेवाः पत्रकार राष्ट्रिय दबूया सहसचिव सुनिता महर्जनं ॐ बहाःत्वाः खलः मिसा पुचः दर्ता



सिडीओ हीके ब्यूगु लोगो



मयाःगु खँयात कयाः सामाजिक सञ्जालय् तयवं उकियात कयाः चर्चा परिचर्चा जूगु खःसा थ्व हे भवलय् दर्ता मजुगु थीथी संघसंस्था लहना वाःपौ यात थःपिनिगु संस्था दर्ता मजुगु जानकारी बिउगु खः।

उकथं हे थ्व स्वयां न्ह्यः 'हल्चोक आकाश भैरव समाज' दर्ता यायगु भवलय् नं लोगोय् १९४४ तयाः दर्ता यायत स्वःगु खःसा नेपाल संवत लिकायेकाः विक्रम संवत २०८० तयकाः जक दर्ता याःगु खँ समाजया नायः शेरबहादुर पुतुवारं कनादीगु दु।

वय्कलं नेपाल संवतयात सरकारी ज्याखय् छ्यलेगु धकाः संघीय सरकारं मान्यता बिउसां नं

सिडिओ कार्यालयं सरकारं बिउगु मान्यतायात हे हाचां गायगु ज्या यानाच्वंगु द्वपं बियादीगु दु।

लुमके बहः जू सरकारं नेपाल संवतयात राष्ट्रिय संवत घोषणा यायगुया लिसे सरकारया फुक्कं दस्तावेज्य नेपाल संवत छ्यलेगु निर्णय यानाः तत्कालीन प्रधानमन्त्री पुष्पकमल दाहालं च्वःगु पतिइ तकं नेपाल संवत छ्यःगु खः। उकथं हे थीथी सरकारी निकायं तकं नेपाल संवतयात छ्यलाः पौ च्वय्गु ज्या न्ह्याकेधुंकूगु अवस्थाय् सिडिओ कार्यालयं थुकियात माने मयायगु ज्या गलत जूगु टिप्पणी नेवाः ख्यलय् जुयाच्वंगु दु।

महर्जनया कथं थःपिसं नेपाल

संवत तयाः छाय् संस्था दर्ता याय् मदइ धकाः प्रतिवाद यानागु खःसा सिडिओ कार्यालयया कर्मचारी नेपाल संवत तयगु खःसा संस्था हे दर्ता मयायगु धकाः धायेवं थःपिं बाध्य जुयाः नेपाल संवत चीकाः संस्था दर्ता यायत बाध्य जुइमाःगु खँ कनादीगु दु।

थ्व स्वयां न्ह्यः फसिगां भौमचा पुचः दर्ता यायगु भवलय् नं सिडिओ कार्यालयं संस्था दर्ता यायगु खःसा खँय् भासं भाय् हिउसा जक संस्था दर्ता यायगु धायेवं थःपिनिगु मौलिकता हे तंकाः संस्था दर्ता याय् माःगु खँ संस्थाया सचिव उर्मिला महर्जनं कनादीगु दु।

वय्कः पिसं संस्था दर्ता यायगु

भवलय् 'फसिगां भौमचा पुचः' दर्ता यायत स्वःगु खःसा उकियात नां हिलेत बाध्य याकूगु खँ नं वय्कलं कनादीगु दु। संस्था दर्ता यायगु भवलय् 'फसिगां बुहारी समूह' वयां लिपा ब्राकेटय् (फसिगां भौमचा पुचः) तयकाः जक संस्था दर्ता याःगु खः।

उकथं हे थ्व स्वयां न्ह्यः नेपालभाषाया संस्था 'बाखं दबू' दर्ता यायत स्वःगु खःसा उकियात सिडिओ कार्यालयं अस्वीकार यायवं थःपिसं बाखँ दबू दर्ता हे मयानागु खँ संस्थापक दुजः लोचनतारा तुलाधारं कनादीगु दु वय्कलं धयादिल, 'जिपिसं बाखँ दबू दर्ता यायत स्वयागु खः। तर सिडिओ कार्यालय बाखँ दबूया नां हिलाः 'कथा दबू' तःसा जक दर्ता ययोगु धकाः धायेवं जिमिसं दर्ता मयानागु खः।'।

थ्वहे भवलय् थीथी सामाजिक सञ्जालय् गुगुल ट्रान्सलेटय् नेवारी तल धकाः विरोध यानाच्वपिं नेवाःतयसं धाःसा देशय् दुने दुगु थज्याःगु समस्या हे ज्यंके मफयाच्वंगु इलय् गुगुल ट्रान्सलेटरया खँ तयाः थवंथवय् विवाद यायगु ज्या हे गलत जूगु टिप्पणी नं यानाच्वंगु दु।

स्थानीयपिनिगु इच्छा अःखः महानगरं ज्या यानाचन-पुर्वमेयर बिद्यासुन्दर



लहना वाःपौ/ यें महानगरपालिकाया पुलांमह नगर प्रमुख बिद्यासुन्दर शाक्यं यें महानगरपालिकां थःगु हैसियतक कथं ज्या याय्मफुगु द्वपं बियादीगु दु। यें मनपां थःगु हैसियत कथं ज्या याय् मफुगुलिं थः नगर प्रमुख जुयाच्वनागु इलय् सरकारं हे यें महानगरपालिकायात गुगूगु हैसियतय् तयातःगु खःसा आः वया

महानगरपालिकां थःगु हैसियत कथं ज्या याय्मफयेवं भिन्हयगु थासय् कुहां वःगु खँ धयादीगु खः।

नेपाल खेलकुद महासंघ यें नं ग्वसाः ग्वःगु वृक्षारोपण ज्याइवल्य् न्ववायेगु इवल्य पुलांमह नगर प्रमुख शाक्यं थौकन्हय् यें महानगरपालिका स्थानीय वासिन्दया इच्छा अःखः ज्या यानाच्वंगु द्वपं ल्यं ७ पेजय्





नेवा: राष्ट्रिय म्ये

चमि : दुर्गालाल श्रेष्ठ लय् चिनामि : तिर्थ माली

धुन दने धुन सँन्त्यलं भी फुक्कं हे छम्ह जुइ धुन
भीगु लागाय् भी स्वयं हे जः जुया धुन लुइ धुन
ह्यांगु भुमिइ अष्टमण्डल ह्यांगु चाः दुने थी नगु
भीगु नेवाः ध्वाँय् थ्व हे खः ज्यान भी सकस्यां छगू
जातितय् स्वायत्त राज्यं लुइ कर्पं च्वय् भिलिमिलिं
राष्ट्र भःभः धाय्क न्ह्याके भीगु चःतिं भीगु हिं

सम्पादकीय



राष्ट्रिय गौरवया पूर्वाधारया ज्या याकनं क्वचाय्के माल

सरकारं राष्ट्रिय गौरवया आयोजनायात गुगुं नं कथं
लिमबाकूसें याकनं क्वचायेकेमाः । स्वनिगःयात मेगु थासय्
स्वाइगु पृथ्वी राजमार्ग छगू हे जक दु । त्रिभुवन राजपथ
वा कान्ति राजपथ वा बनेपा-बर्दिवास सतक विकल्पया
रूपय् निर्माण जूगु मदुनि । स्वनिगःया मधेश प्रदेश लिसे
स्वाइगु सतक निर्माण यायेमाःगु आवश्यकता जूगुलिं
द्रुतमार्गया परिकल्पना याःगु जक मखु उकियात विशेष
महत्व बिउगु खः ।

निर्माण जुयाच्चंगु द्रुतमार्ग योजना कथं न्ह्यात
धाःसा वइगु २०८३ साल दुने क्वचाइ । गुकिया लिच्चः
कथं तराईनिसें यें तकया दूरी म्हो जुइ । नेपाःया सेनां
दयेकाच्चंगु सतकय् वयाच्चंगु पंगः चिकेगु नितिं सरकारं
गुगुं कथं भूमिका म्हितेमाःगु खः उगु कथं भूमिका म्हिता
मच्चंगु प्रधानसेनापतिं हे संसदया छगू समितियात जानकारी
याकूगु खः । द्रुतमार्गया आः तक ३५.३८ प्रतिशत भौतिक व
३६.६६ प्रतिशत आर्थिक प्रगति जूगु दु । २०८३ फागुन तक
क्वचायेकेगु आज्ञु तयातःगु द्रुतमार्ग थुगु हे गति न्ह्याइगु
खःसा इलय् पूवनिगु सम्भावना मदु ।

द्रुतमार्गय् दकलय् महत्वपूर्ण खँ धइगु यलया खोकनाय्
यायेमाःगु जग्गा अधिग्रहण खः । खोकना सम्पदा क्षेत्र
जूगुलिं अनं हे द्रुतमार्ग न्ह्याकेगु वा मयायेगु धयागु बहस नं
जुयाच्चंगु दु । तर आः तक नं बाराया निजगढ अन्तिम बिन्दु
व खोकना शुरुवात निगुलिं थासय् जग्गा अधिग्रहणया ज्या
क्वचायेके फयाच्चंगु मदु । जग्गा अधिग्रहण यायेगु दायित्व
सरकारया खः सेनाया मखु । अले जग्गा अधिग्रहणया नितिं
सरकारं परिपक्वता क्यनेमाःगु खः । तर क्यनाच्चंगु मदु ।
द्रुतमार्ग थेंज्याःगु महत्वपूर्ण आयोजना अर्थतन्त्र थकायेत
रणनीतिक सतक जुइफु । तर सरकारं थुकियात गुलि
महत्व बीमाःगु खः बियाच्चंगु मदु ।

नेपालय् न्ह्यानाच्चंगु खुगू मध्ये स्वंगू राष्ट्रिय
गौरवया आयोजना न्ह्यानाच्चंगु दु । अले थज्याःगु राष्ट्रिय
गौरवया आयोजनाय् दकलय् अक्वः पंगः वनाच्चंगु धइगु
जग्गा अधिग्रहण व सिमा पालेगु खः । थ्व जग्गा अधिग्रहण
व सिमा पालेगु ज्या यायेगु नितिं सरकारं गुगुं नं कथंया
थःगु दायित्व पूर्वकेमाः । गुगुं नं कथंया राष्ट्रिय गौरवया
आयोजना लिबाकेगु धइगु विकास निर्माणय् सरकारं महत्व
मबिउगु कथं कायेमालेफु ।

स्वतन्त्र, अग्रिम, जानकारी नापं मञ्जुरी छु खः ?- ३



श्रीकृष्ण महर्जन नेवाः

नेपालय् एफपिकया अवस्था गथे दु ?

नेपालं सन् १९९३ सं जैविक
विविधता सम्बन्धी महासन्धि व
सन् २००८ सं अन्तर्राष्ट्रिय श्रम
संगठन महासन्धि १९९ लागू यात ।
अथेहे नेपालं सन् २००७ सं आदिवासी
जनजातिया अधिकार सम्बन्धी संयुक्त
राष्ट्रसंघीय घोषणापत्रया पक्षय् मतदान
यात । नेपालं जलवायु परिवर्तन
सम्बन्धी संयुक्त राष्ट्र संघीय खाका
महासन्धि (युएनएफसीसीसी) लगायत
आदिवासी जनजातिया अधिकार नाप
सरोकार तइगु मेगु आपालं अन्तर्राष्ट्रिय
कानूनी दस्तावेजतय् ल्हाःचिं तःगु
जुल ।

राज्यं अन्तर्राष्ट्रिय कानूनय्
ल्हाःचिं तःगु धयागु उगु कानूनं
बियातःगु अधिकार व व्यवस्था
यानातःगु प्रावधानयात कयाः
प्रतिबद्धता प्वकेगु खः । अन्तर्राष्ट्रिय
कानून छ्यलाबुलाय् हय्थुंकाः उगु
अन्तर्राष्ट्रिय कानून व राष्ट्रिय कानून
दथुइ मिले याय्गु राज्यया दायित्व
जुइ ।


तर नेपालं राष्ट्रिय रेडप्लस
रणनीति लगायत छुं सीमित नीति,
नियमावली, निर्देशिका व रणनीति
पतिइ एफपिक लागू याय्माः धाय्
वं आः तक छुं नं राष्ट्रिय कानूनय्
एफपिकया स्पष्ट व्यवस्था व व्याख्या
याःगु मदु ।

थौंया इलय् नेपाःया हिला
वनाच्चंगु राजनीतिक व शासकीय
परिप्रेक्ष्यय्, विकास निर्माण व आर्थिक
उन्नतीयात प्राथमिक मुद्दाया रूपय्
न्ह्यब्वःगु दु । वहे कथं, थीथी ख्यलय्
विकास ज्याइवः व परियोजनां गति
काइगु अनुमान याय्फइ । तर कानूनी
रूपय् एफपिक बारे व्यवस्था यानामतःगु
अवस्थाय्, नेपाःया आदिवासी
जनजाति अक्व अक्वः सीमान्तकृत
जुइ । इमिगु परम्परागत ज्ञान, सीप, व
म्वाय्त माःगु ज्याखँ अर्थात जिविका
तकं लोप जुइ, थःपिं न्हापांनिसें च्वनाः
वयाच्चंगु भूमि थाय्बाय् (थातथलो)
पाखें विस्थापित जुइगु बाय् जबरजस्ती
मेमेगु थासय् पिंतिना छ्वइगु व इमिगु
आध्यात्मिक नापं सांस्कृतिक मूल्य,
मान्यता व परम्परा अवमूल्यन बाय्
म्हासे जुइगु खतरा दइ ।

पूर्ण व प्रभावकारी सहभागिता :
'पूर्ण व प्रभावकारी
सहभागिता'या अवधारणायात
जलवायु परिवर्तन सम्बन्धी संयुक्त राष्ट्र
संघीय खाका महासन्धि अन्तर्गतया
'क्यानकुन' सम्झौताय् न्ह्यब्वयातःगु
रेडप्लस सुरक्षा लँपुयात लिधंसा नाला
थुइके फइ । उगु सम्झौताया अनुसूची
१ (निर्णय १/सीपी १६) या बुँदा (घ)

कथं रेडप्लस सुरक्षा नीति अन्तर्गत
सरोकारवालात विशेषतः आदिवासी
जनजाति व स्थानीय समुदायया
'पूर्ण व प्रभावकारी सहभागिता' सं
बः बियातःगु दु । उगु सम्झौताया
मू निर्णय पाठय् 'पूर्ण र प्रभावकारी
सहभागिता' धाय्बलय् छु छु खँत
दुथ्याः धयागु खँ ध्वाथुइक न्ह्यः खँ
बिया मतःसां रेडप्लस सुरक्षा नीति बारे
सरोकारवालायात सम्बोधन व सम्मान
याय्गु पक्ष राष्ट्र नाप छगू सूचना प्रणाली
दय्माःगु खँ न्ह्यथंगु दु । उगु सम्झौतां
ज्या तालाकेत दयेकातःगु सुरक्षा सूचना
प्रणालीयात लिधंसा नाला काय्ज्यू
'पूर्ण प्रभावकारी सहभागीता' या नितिं
सरोकारवालातय्गु दथुइ परियोजना
सम्बन्धी सूचं कालबिल जुइमाः व
परामर्शया लिसें पारदर्शी, समावेशी,
प्रतिनिधि मूलक व उत्तरदायी ज्याखँत
नालेमाः ।

एफपिक छुकिं माः ? व छाया ?



आदिवासी समुदायपाखें
प्रथाजनित रूपं भोगचलन, व्यवस्थापन
व स्वामित्व ग्रहण यानाः वयाच्चंगु
प्राकृतिक स्रोत साधनयात कयाः इमिगु
पहुँच व अधिकारय् लिच्चः लाइगु
छुं नं परियोजनाया स्वीकृति बाय्
न्ह्याकेन्ह्यः माःकथं परियोजनायात
छ्यलाबुल्लाय् हय्गु इवलय् एफपिक
यायेमाः । थुकिं याना पिनेया व्यक्ति,
समुदाय बाय् संस्थापाखें न्ह्याकूगु
परियोजनाय् आदिवासी जनजातिया
सांस्कृतिक ल्याखं माःकथं ब्वति
काय्केगु सुनिश्चितता यानाः बिइमाः ।

लिसें थ्व नं थुइके हे माः कि
छक्कः मञ्जुरी बिउसां परियोजनाया
छुं नं चरणय् उगु मञ्जुरी लितः
काय्फैगु अधिकार आदिवासी
जनजातिइ न्ह्याबलें सुरक्षित जुइ ।
थीथी ख्यलय् गथेकी जल व ऊर्जा
विकास, सडक विस्तार लगायत मेगु
भौतिक पूर्वाधार विकास, वातावरण
संरक्षण, जलवायु परिवर्तन, जैविक
विविधता, पर्यटन विकास आदिइ
एफपिकया छ्यलाबुला जुइमाः ।
एफपिक छगू ज्याभः खः गुकिं
विकासया गतिविधियात आदिवासी

जनजातिया अधिकार, माःकथं
न्ह्याःवनेत ग्वहालि याइ । थुकिं
आदिवासी जनजातिया परियोजना
प्रतिया अपनत्व कायम याय्त, द्वन्द्व
म्हो याय्त, पारदर्शिता कायम याय्त
व लाभया समतामूलक वितरण
प्रबर्द्धन याय्त, विश्वासया लकस
ब्वलंकेत व वइगु दिनय् आदिवासी
जनजातिलिसे याइगु सहकार्य व
सहकारितायात क्वातुकेगु नापं
परियोजना व ज्याइवःयात लिपा तक
बांलाकेगु नितिं ग्वहालि याइ ।

अथेहे एफपिकया पालनां
परियोजना सञ्चालक, व्यवस्थापक,
लगानीकर्ता आदिया आदिवासी
समुदायलिसे जुइफैगु द्वन्द्वयात म्हो
यानाः सम्भावित लिबाइगु, कानूनी
कचवं व उकिनाप स्वानाच्चंगु आर्थिक
भार व सस्थागत प्रतिष्ठाय् लाइगु
बामलाःगु लिच्चः आदि समस्या
सम्बोधन याइ ।

सरकारी निकायपाखें एफपिक
छ्यलाबुला याय्त राज्यं लागू बाय्
अनुमोदन याःगु अन्तर्राष्ट्रिय कानूनत
गथे कि श्रम संगठन महासन्धि
१९९, आदिवासी जनजातिया
अधिकार सम्बन्धी संयुक्त राष्ट्र
संघीय घोषणापत्र, जैविक विविधता
महासन्धि आदिप्रतिया उकिया
प्रतिबद्धता क्यनी ।

एफपिक गथे यानाः न्ह्याकेगु ?

बास्तवय् एफपिकयात पाय्छि
कथं छय्लेगु खःसा आदिवासी
जनजातिनाप सहलह परामर्श याय्गु व
इमिगु मञ्जुरी जक काय्गु मखु इमि
परियोजनाया समग्र योजना निर्माण,
कार्यान्वयन, अनुगमन व मूल्यांकन
चरणतय् हे पूर्ण व प्रभावकारी कथं
ब्वति काय्केमाः । परियोजनाया बारे
फुक्क जानकारी पारदर्शी कथं बोध
याकेमाः ।

एफपिकया छ्यलाबुला सन्दर्भ
व परिप्रेक्ष्य कथं ब्यागल ब्यागलं
जुइफु । अय्सां क्वय् न्ह्यथना कथं
प्यांगू चरणत एफपिकया लिच्चः लाइगु
कथं नालेफु ।

कथं

भोटो जात्रा छाय् याइ ?



प्रेममान डंगोल

नेपाःया थीथी नखः चखः व द्यःपिनि जात्राया विशेषतां यानाः हे हलिमय् नां जायाच्चंगु दु। भीगु तजिलजि व भीगु परम्परां हे हलिमय् नेपाःयात सांस्कृतिक देय् धकाः म्हसिकेगु यानाच्चंगु खः। नखः चखः व जात्रा हनेगु इवलय् भीथाय् नेपालय् बुंगद्यःया जात्राय् भोटो जात्रा अर्थात जाह्वला जात्रा नं जुइ। थ्व प्वाकलं अथवा भोटो क्यनेगु जात्रा छाथ् जुइ धइगु सन्दर्भय् भीगु समाजय् छगू पुलांगु व न्ह्यइपूगु किम्वदन्ती दु।

छन्हुया न्हिं टौदहया कर्कोटक नागराजया जहान लानिया मिखा स्यात खनी। लानिया मिखा स्याःगु लंकाबीम्ह बैद्य मामां कर्कोटक नागराजा मनूया रुपय् पृथ्वीलोकय् चाःहिलाच्वन। उगु इलय् बुँइ ज्या यानाच्चंम्ह छम्ह किसान खन। उगु इलय् किसान थः दुगुचिया मिखा सफा यानाच्चंगु जुयाच्वन। व खनाः मिखाया वासः याइम्ह बैद्य धकाः ताय्काः नागराजां किसानयात थः जहानया मिखा स्याःगु लंका बिमाल धकाः धाल। किसानया छुं हे खँ तकं मन्यंसे कर यानाः नागराजां वयात ब्वनार्यंकल।

टौदह सिथय् थ्यंकाः किसानयात मिखा तिसिके बियाः किसान लिसे नागराजा पुखुलिइ क्वब्बात। पुखुलिइ दुने थ्यंकाः अन किसानं नागराजाया भब्य दरवार खन। नागराजया दरवार खंबलय् किसान अलमल जुल। छु याय् छु मयाय् जुल। मनमनं ग्या नं ग्यात। नागराजाया दरवार खनाः। उगु इलय् कर्कोटक नागराजां थः रानीयात किसाननया न्ह्यःने हयाः वया मिखा स्यानाः च्वने हे मफु। मिखा स्याःगु लंकाबी माल धाल।

आः धाःसा व किसानयात फसाद हे जुल। सःगु ला मखु, मसः धाय् नागराजाया न्ह्यःने दु। करुणामयया नां कयाः ‘का प्रभु, जिं छुं मस्य्, छःपिनिगु हे शरणय् वया, थ्व रानीया मिखा स्याःगु लंकाबीमाल’

धकाः छु याय् छु याय् यायां थःगु गःपतय् ल्हाः संकाच्चंगु, अन हे पिहांवःगु खिति रानीया मिखाय् तय् काबिल। अजूचायापुक किसानया व वासलं उग्रिमय् रानीया मिखा स्याःगु लन।

रानीया मिखा स्याःगु लंगु खंबलय् कर्कोटक नागराजा तसकं लय्ताया धाल, ‘का छु फ्वनेयः फ्वँ, छं धाःगु बी।’ किसानयात छु फ्वने छु फ्वने जुल। थय्क मिखा चाःहिकूबलय् कर्कोटक नागराजां फिनातःगु हिरामोती जडित भःभः धाःगु भोटो खन व हे छपाः माल धकाः फ्वन। कर्कोटक नागराजा नं लय्ताया च्वंगु इलय् थम्हं फिनातःगु रत्न जडित



थ्व भोटो जात्राय् न्हापाया इलय् जुजु व थौकन्हय् राष्ट्रपतिलिसें मन्त्री, भाइभारदार दक्कसिनं ब्वति काय्माःगु परम्परा दु।

भोटो हे त्वयाः किसानयात बिल। किसान लय्तातां व भोटो फिनाः अनं थःगु छेंपाखे लिहांवन।

छन्हुया न्हिं किसान वहे भोटो फिनाः बुँइ ज्या यावन। निभाः तसकं थिना च्वंगुलिं तान्वयाः भोटो त्वयाः सिमा क्वय् तयाः किसान बुँं पालाच्वन। उबलय् हे अन बुँइ छम्ह भूत वल। व भूतं बुँया सिथय् छथाय् हिरामोती दुगु स्वयंबलय् तसकं बांलाःगु भोटो अथें वांछ्वयातःगु खन। बांलाःगु भोटो खनेवं त्वःवनाः भूतं भोटो फिनाः वनाछ्वत। थःगु सुरय् बुँइ ज्या यानाच्चंम्ह किसानयात भूतं भोटो फिनाः वंगु होश हे मदु। लिपा स्वःबलय् थम्हं तयाथाय् भोटो मदु, भोटो मखनाः किसाननया अलाप विलाप यानाच्वन।

न्हिं बिनावं वन। छन्हु करुणामय बुंगद्यःया जाह्वला जात्रा स्वय्त

किसान जाह्वला ख्यलय् थ्यंकः वन। अन भूत नं व हे भोटो फिनाः जात्रा स्वःवःगु जुयाच्वन। थःगु भोटो खनेवं किसानं भूतयात ज्वनाः भोटो लित हजि धाल। किसानं ‘थ्व जिगु भोटो खः, छं खुयायंकूगु खः। हजि जिगु भोटो’ धकाः हालाः किसानं भूतया गःतां ज्वंवन। भूत नं ‘गन जिं थ्व भोटो खुया हयागु खः, थ्व ला जिं लुइकागु खः’ धकाः धयाच्वन। उमिगु थ्व त्वापुया खँ जुजु नरेन्द्र देवया थाय् तक हे थ्यन। नरेन्द्र देवं उपिं निम्हेसितं ज्वनाः थः थाय् हजि धकाः सिपाहीतय्त उजं बिल। जुजुया उजं कथं निम्हेसितं जुजुया न्ह्यःने थनेहल। जुजुया न्ह्यःने थ्यंकाः नं



उपिं निम्हं व हे कथं त्वानाच्वन। थ्व खनाः जुजुं आः थ्व भोटो बुंगद्यःया हे जिम्माय् बीगु, सुनां थ्व भोटो थःगु खः धकाः दसि प्रमाणलिसें दाबी याः वइ, वयात हे दइ धकाः बुंगद्यःयात हे बियाबिल।

व हे इर्लानिसें आः तक बुंगद्यःया जात्राया लिपांगु न्हिं भोटो क्यनेगु यानावःगु खः। थ्व भोटो सुयागु खः धकाः प्यंगुलिं हे दिशाय् क्यनेगु याइ। थ्व भोटो जात्राय् न्हापाया इलय् जुजु व थौकन्हय् राष्ट्रपतिलिसें मन्त्री, भाइभारदार दक्कसिनं ब्वति काय्माःगु परम्परा दु। भोटो जात्रा क्वचायेवं बुंगद्यःया मूर्तियात खतय् तयाः कुबियाः बुंगय् लित यंकी। भिर्निदैय् छक्कः धाःसा रथ हे सालाः बुंगय् यंकेगु चलन दु। बुंगद्यःयात बुंगय् खुला व यल तःबहालय् खुला तयगु याइ।

गुंला नखःया महत्व व महिमा

दैय्दंस साउन शुक्ल प्रतिपदा निसे भदौ शुक्ल प्रतिपदा तक लच्छि यकं स्वनिगःया नेवाःतय्स गुंला नखः हनेगु याइ। उगु इलय् स्वयम्भू महाचैत्यय् तःजिक मेला जुइ। उगु इलय् स्वयम्भू व वया जःखः चाःहिलाकि पारिवारिक सुख, शान्ति व समृद्धि दइ धइगु धार्मिक विश्वास दु। स्वनिगःया बौद्धमार्गी नेवाः समदायीप थःथःगु त्वालय् च्वंगु चिभाः चाःहिला गुंला हनेगु याइ। थ्व नखः लच्छियकं हनी।

बौद्ध धर्मावलम्बीपिसं गुंलाया इलय् न्हिन्हि सुथय् बाजं थानाः स्वयम्भू महाचैत्यय् नापं बौद्ध विहार, बहाः बहि चाःहिलाः गुंला हनी। भक्तजनपिं स्वयम्भू महाचैत्यया दर्शन याय्धुका शोभा भगवति, विजयेश्वरी, जन्माद्यः याःगु दर्शन यासें थीथी बौद्ध विहार बहाः चाःहिला थःथःगु छँय् लिहां वनी। थुगु नखः हनीबलय् छगू कथं न्ह्यइपुसे च्वनी। गुंलायकं स्वयम्भू महाचैत्यय् तसकं हुल जुइ। अभ्र थुगु इलय् ज्ञानमाला भजन न्यनेगु उलि हे न्ह्यइपु। थुगु गुंला इलय् लच्छि व्रत च्वनाः न्हि न्हि स्वयम्भू महाचैत्यय् पूजा याय्त श्रद्धालु भक्तजनपिनिगु हुल जुइ। अथे हे गुलिस्यां न्या, ला, अय्ला व थ्व त्वःतेगु याइ। गुंलायकं स्वयम्भू महाचैत्य नापं हारती अजिमाया थाय् न नेवाःतय्सं विशेष कथं छा हाय्केगु (विशेष पूजा) नं याइ।

थुगु सम्बन्धय् छगू आख्यान कथं प्राचीनकालय् हारती अजिमां थः १०८ म्ह मस्त लहिइत मनूया मस्त खुयाः नयगु याइ। तीपि मस्तया मां अबुपि ख्वयाः ख्वयाः जुयाच्चंगु स्वयां स्वये मफयाः बुद्ध भगवानं हारती अजिमाया दक्क मस्तय्त गुंला लच्छियकं सुचुका बिज्याःगु खः। अजिमां थः मस्त भगवान बुद्धनाप लितं फ्वनिइ। वयां लिपा भगवान बुद्धं छिमित थः मस्तय्त गुलि मतिना दु, मेपित उलि हे मतिना दइ, उकिइ आर्वनिसें छं सुयागु न मचा खुयाः नयेमते अखवतं उमित मतिना याना रक्षा यायेमाःगु बचं कया जक भगवान बुद्धं हारती अजिमायात तसकं यःपि खुम्ह मचा लित बियाः मेपिं मस्तय्त अजिमा द्यः न्ह्यनेच्चंगु मण्डलय् त्वपूना बिज्यागु खः। उगु इर्लानिसें अजिमांया विशेष पूजा यायगु इलय् १०८ म्ह मस्तय् नं नकेगु कथं पिने च्वंगु मण्डलय् नं पुजा याःगु खः धाइ। हारती अजिमा द्यःया पुजा यायगु इलय् मनय् तःगु इच्छा पूर्वनिगु व मस्तय्गु नं रक्षा जुइगु जनविश्वास दु।

स्वयम्भू पुराणया कथं

प्राचीनकालय् स्वनिगः छगू तःधंगु पूखु कथं दुगु इलय् विपस्वी नांया बुद्ध वयाः पलेस्वां पिनाः वंगु जुयाच्वन। वहे पलेस्वां ह्वयाः पलेस्वा च्वय् धर्मधातु ज्योतिंया कथं स्वयम्भू उत्पति जूगु धका धायगु याइ। व हे स्वयम्भू ज्योति उत्पति जुया दर्शन याय्त महाचीन पाखे थः निम्ह जहानपिं वरदा व मोक्षदा नापं ज्वनाः वम्ह महामञ्जुश्रीं दकलय् न्हापां स्वयम्भूया ज्योति दर्शन यायेगु इवलय् निपा ल्हाः प्यपुंकाः ‘ओम् मणि पद्मे हूँ’ धका मन्त्र ब्वंगु धकाः धायगु याइ।

वयां लिपा महामञ्जुश्रीं चोभारया जवं खवं च्वंगु पहाडय् छवे वरदा व मेखेपाखे मोक्षदायात तया थःगु खड्गं चोभारया पहाड न्हासिकापय् प्रहार यासे पूखु जुयाच्चंगु दक्कं लः पित छवंया मञ्जुश्रीपतन नांया बस्ती दय्कूगु खः। लिपा वरदायात तयातःगु पहाड फूच्चः व मोक्षदायात तयातःगु पहाड चम्पादेवीया नामं प्रख्यात जूगु धकाः धाइ। धर्मधातु रूपी स्वयम्भूया ज्योतियात त्वपुना महायान धर्म गुरु शान्ति कराचार्य स्वयम्भू महाचैत्य निर्माण याःगु खः। उगु इलय् निसे चिभाः पुजा याय्गु परम्पराया नापं चिभाःयात चाःहिलेगु यानाः गुंला न्याकेगु यानाच्चंगु खः।

विशेष याना नेवाः समुदायया बौद्ध धर्मावलम्बीपिसं श्रृंगभेरी अथे धइगु न्यकूया बाजा पुयाः स्वयम्भू महाचैत्य प्रदक्षिणा याय्गु याइ। मदुपिनिगु आत्माय् शान्ति जुइमाः, सुखावती भुवनय् बास लाय्मा धइगु कामना यासे थःपिनिगु जहान परिवारपिसं म्येया न्यकूया पुयाः स्वयम्भु चाःहिली। गुंला लच्छियकं बौद्ध स्तोत्र, धारणी, नाम संगीती व सद्‌धर्म ग्रन्थ पाठ याइ।

गुंलाया इलय् नागपञ्चमी, यल, यै व ख्वपय् पञ्चदान, क्वाःति पुन्ही, क्वान्ति महाद्यःया थाय्, सिलुइ मेला, साया जात्रा, यलय् मतयाः जात्रा, देवपतनय् खड्ग जात्रा व रोपाई जात्रा, श्रीकृष्णाष्टमी, अबुया ख्वाः स्वयगु नापं यक्क नखः चखः गुंलाया इलय् हनेगु याइ।

गुंलाया इलय् साउन महिनाया सोमवाः महाद्यःया मेला नं जुइगुलि तसकं महत्वपूर्ण कथं काय्गु याः।

थुगु इलय् सिद्धार्थ गौतमं बोधिसत्व ज्ञान नापं बुद्धत्व प्राप्त याःगु खः। थथे थीथी विशेषतां जाःगु गुंलाया महत्व व विशेषतां यानाः नेवाःतय्गु धर्म, संस्कृति व परम्पराया धरोहर तसकं च्वन्ह्यानाच्चंगु दु।

राम प्रजापति
प्रोप्राइटर

हारती मिठाई भण्डार
(बुद्ध शाकाहारी)

कालिमाटी चोक, टंकेश्वर मार्ग, काठमाडौं।
फोन नं. : ०१-५३७२९९९, मो. ९८०३९८०६९९

यहाँ:-विवाह, व्रतबन्ध, पार्टी, पिकनिक, तथा अन्य शुभ कार्यको लागि अर्डर अनुसार मिठाईहरू तयार गरिन्छ।

आर्यो नून खाउँ स्वस्थ रहौ

आर्यो नून खाउँ स्वस्थ रहौ

आर्यो नून खाउँ स्वस्थ रहौ

आर्यो नून खाउँ स्वस्थ रहौ

आर्यो नून खाउँ स्वस्थ रहौ





किपा : हर्कबहादुर श्रेष्ठ

निपु हाइकु



सुरेश प्रधान, धाँलाखै, यल ।

बुंगछः यलय
गथांमुगः मथन
दिलाचःहे द्याः

चलःया धःवा
न्यायपंकथि दुवातय
छ्वालिव्वाः छ्वासय ।

न्यापु हाइकु



पूर्णिमा शाक्य, “पामिला”

आजु जय हाः
भूत पतिनाछ्वत
न्यलय थ्वःगु सः । १

प्यकालँ दुवाः
तिंकथि थनातल
यगाः महिताः । २

चुईचौय् हाली
कतांमरी यखायनु
कि ल्वमां त्यलो ३

लुँ बहःया मू
दामय् मखु छ्यलाय् न्हां
नँ अंगु दंग । ४

कायमचा नखः
संस्कृति तःमिपिं भी
म्याय्या भस्काः । ५



विजय रत्न असंबरे

१
गथांमुगः हं
मखु घन्टाकर्ण हं
आजु जय हा

२
भुत पिशाच
नेतात ख्यायमाल
गथांमुगः खः

गथांमुगः

३
लिताहःम्ह जि
ख्याकंमखु मनुखं
त्यासा ल्यँदनि

४
राक्षसी पह
जंगल वःम्ह व
सत्ताया सवा

५
अंगुलिमालं
बुद्ध पियाचवन
गथांमुगः खन ।



न्यापु हाइकु



पौभाः डंगोल, पाँगा, किपू

१
ग्वाः ग्वाः माले म्वां
गथांमुगःत थन
पलाः पतिकं ।

२
तिंकथि लुल
मिप्याःलिसँ पितिन
बौ वायेके ब्यु ।

३
न अंगु न्याययः
गथांमुगःया नामं
भूतं थीमखु

४
पाःचापतिकं
छँखौपिने न्याकुने
कःबजि बौस्वौ

५
सिनाज्या क्वचाः
नखःचखः हनेत
सकलें दंगा

न्यापु हाइकु



रत्न मन

१
गंसि जुल स्व
गथांमुगःया म्हगः
आजु जय हाः ।

२
खुसि बाः वल
गथांमुगः च्चीकेत
मिखाय् ख्ववि जाः ।

३
गथांमुगः द्याः
कतांमरि तंगुलिं
आजु जय हाः ।

४
छँय् गुंगु थना
भूत पतिना च्वन
मनं मचीकु ।

५
संस्कार तन
हालाहुलु नं पत्यां
आजु जय मधाः ।

हरेक मंगलवार
राष्ट्रियताको लागि समर्पित



मेरो साप्ताहिक
मेरो साप्ताहिक Mero Saptahik
मालाः मालाः ब्वनादिसँ ।



Sweet Cave
(जीवन दाईया पसः)

Kalimati, Kathmandu, Nepal
Tel: 4275511, 9741112777, 9851063000

यहाँ भोज तथा पार्टीहरूको लागि चाहिने स्पेशल दही, पनिर, लाखामरी, लालमोहन, बर्फी, रसबरी तथा अरु विभिन्न परिकारका मिठाईका लागि सम्पर्क राख्नुहोस् ।
आउटडोर भेज क्याटरिङ पनि गरिन्छ ।

प्रतिभा समाजय् चित्रकला कासा



लहाना वा:पौ / प्रतिभा समाजया ३० क्व:गु दँ मुज्या व प्रतिभा बुक बैंकया दँ मुज्या सातोआकी इटो स्मृति दिवसया लसताय् ज्याइव: यासँ हंगु दु। ज्याइवल्य् योड पिकासोया प्राविधिक ग्वाहालि चित्रकला कासा जूगु खः। कासाय् ३६ गू ब्वनेकुथिया ४० म्ह विद्यार्थी ब्वति का:गु खः। कासाय् बालकिशोर चौधरी,

सीतु मार्के व राजकुमार महर्जन निर्णायकया कथं च्वनादीगु खः। सिनियरपाखे न्हाप- नोरिन श्रेष्ठ, ल्यू-पालजा महर्जन, लियांल्यू जेनिसा बज्राचार्य व ह:पा: प्रजना श्रेष्ठ ला:गु खः। अथे हे जुनियरपाखे न्हाप उत्सव चौधरी, ल्यू श्रीजल अधिकारी, लियांल्यू आशिर्य देसार, ह:पा: सिरपा मैत्री शाक्य व नुसला श्रेष्ठयात

बिशेष ह:पा: सिरपा: इन्द्रेणी प्रधान त्याकादीगु खः।

ज्याइव:या मूपाहाँ यल महानगरपालिकाया उपमेयर मञ्जली शाक्य हना पौ, प्रतिभा समाजया नाय: डा.बज्रराज शाक्य नगद सिरपा व सचिव किरणनरसिं शाक्य मेडल ल:ल्हानादीगु खः। अथे हे प्रतिभा बुक बैंक भीनिगु त:गिमय् ब्वनिपित सफू ल:ल्हायेगु ज्या न जूगु खः। शोभा बज्राचार्य न्ह्याकादीगुलि ज्याइव: समाजया नाय: डा.बज्रराज शाक्यया अध्यक्षताय् जूगु खः। ज्याइवल्य् डा.चुन्दा बज्राचार्य, शाक्य सुरेन, त्रिरत्न कोषया अध्यक्ष सुदनरत्न बज्राचार्य व अजय देशरपिसं ब्वति कयादीगु खः। दँ मुज्याँया लसताय् बोधिवृक्ष सिमाक्व (बुद्ध धर्म सम्बन्धी) व साहित्य फल्चा साहित्य सम्बन्धी अन्तरक्रिया ज्याइव: न जूगु खः।

संसार संगीतालयया पलिस्था

लहना वा:पौ / नेवा: संगीत ख्य:या संरक्षण व सम्बर्द्धन यायेगु आज्जु तथा: यलया खोनाय् संसार संगीतालय पलिस्था या:गु दु। संकिपा व संगीत ख्यल्य् दिपा मदिक पला: न्ह्याका: च्वनादीम्ह कलाकार स्वतन्त्र संसार महर्जनया कुतलय् पलिस्था जूगु संगीतालयया बिहिवा: विधिवत रुप उलेज्या जूगु दु।

यल महानगरपालिका वडा २१ या वडा अध्यक्ष रविन्द्र महर्जन मूपाहाँ कथं भा:गु ज्याइवल्य् म्ये हालामि संगीत सेवी व समाज सेवी सरिता महर्जनपाखे थीथी बाजं व संगीत सम्बन्धी हलंज्वलं संसार संगीतालययात ल:ल्हाना: उलेज्या यानादीगु खः। सन्सारि ग्रुपया संरक्षक स्वतन्त्र संसार महर्जन लसकुस यानादीगु खः।

संसार्सि ग्रुपया संस्थापक प्रेमा संसार महर्जनपाखे खादा क्वखायेका: पाहापिन्त लसकुस या:गु



ज्याइवल्य् नांजा:म्ह संगीतगुरु रत्न बेहोशी, बरिष्ठ संगीतक:मि जुजुकाजी रञ्जित, नांजा:म्ह म्येहालामि प्रवेशमान शाक्य, संगीतक:मि अनिल तुलाधर, साहित्यकार विक्रमभक्त जोशी व नेपालभाषाया न्हापाम्ह बरिष्ठ सिनेपत्रकार विजयरत्न असंबरे पाहां कथं भायादीगु खः।

ज्याइवल्य् संस्थाया संरक्षक स्वतन्त्र संसार महर्जन व म्येहालामि सरिता महर्जनया नापनापं

वरिष्ठ म्येहालामि जुजुकाजी रञ्जित, लोकह्वा:म्ह म्येहालामि प्रवेशमान शाक्य व किशोर शाहीपिसं सांगितिक कला न्ह्यब्वयादीगु खः।

नेपालभाषाया सांगितिक ख्य:यात तब्या याना: यंकेत तिब: जुइकथं थीथी ज्याइव: यायेगु आज्जु संगीतालयं तयात:गु दु। थ्वहे इवल्य् छुं ई लिपा संगीत प्रशिक्षणया ज्याइव: न न्ह्याकेगु ग्वसा: दूगु खँ महर्जन कनादीगु दु।

नेवा: सूचना केन्द्रया दँमुँज्या क्वचाल



लहना वा:पौ/नेवा: सूचना केन्द्रया न्ह्यक्व:गु दँ मुँज्या क्वचा:गु दु। ज्याइवल्य् मूपाहाँ कथं लुम्बिनी बौद्ध विश्व विद्यालयया डीन डा. मणिकरत्न शाक्य भायादीगु खः।

केन्द्रया नाय: रमिता बज्राचार्यया अध्यक्षताय् जूगु ज्याइवल्य् नेपालभाषा एकेडेमि, बिराट नेपालभाषा साहित्य सम्मेलन गुथि, मिसा साहित्यकार मुना, नेवा: हाइकू कविताया लाय्कू सिद्धिदास प्रतिष्ठान, लोक साहित्य परिषद्, नेवा: स्यनामि दबू जगतसुन्दर ब्वनेकुथि लगायतयात सुभाय पौ ल:ल्हा:गु खः



“बैद्य बा” संकिपा पिहाँ वइगु



लहना वा:पौ/वाङमय शताब्दी पुरुष सत्यमोहन जोशीया च्वसां पिदंगु ‘बैद्य बा’ नांयागु पुधाप्याखं आ: संकिपाया कथं पर्दाय् वइगु जूगु दु। यलया नांजाम्ह साहित्य अन्वेषक भाषाविद् पन्नाप्रसाद जोशीया जीवनया छगू घटना लिसे स्वापू दुगु पूर्धां प्याख्यात शान्तराज शाक्य संकिपा दयेकादीगु खः।

नेपा: देय्या इतिहास व सांस्कृतिकतां जा:गु ‘गुरुमापा’ व ‘यलय बाथ’ थेंजा:गु नेवा: संकिपा दयकादीधुंकुम्ह शान्तराज शाक्यया निर्देशनय् ‘बैद्य बा’ पिहाँ वइगु जूगु दु। थुगु संकिपाय् शरद कसा: भाजुं बैद्य बाया मू भुमिका म्हितात:गु दुसा

वय्क नापनापं पुर्णिमा शाक्य, नबिन थेक्वमि, धर्मकृष्ण श्रेष्ठ, सोनी श्रेष्ठ, हिकमत श्रेष्ठ व मचा कलाकार श्रीज्ञा शाक्य लगायत आपालं कलाकार पिन्सं थीथी भुमिकाय् अभिनय यानात:गु दु।

संकिपाया किपालुमि सिद्धार्थ शाक्य व संजोग श्रेष्ठ, सम्पादन संजीवन शाक्य व सहनिर्देशक कृष्ण प्रजापति खः।

शताब्दी पुरुष जोशीया नाट्य कृति ‘बैद्य बा’ या संकिपाया रुपय् शान्तराज शाक्य च्वयादीगु खः। लोक साहित्य परिषदया निर्माण कथं तयार जूगु थ्व संकिपाया निर्माण व्यवस्थापक राजीत बहादुर श्रेष्ठ खः।

मरु गणेद्य:या सफू विमोचन



लहना वा:पौ/ मरु गणेद्य:यात कया: च्वयात:गु ‘अशोक विनायक’ सफू विमोचन जूगु दु। मरु गणेद्य: गुथिया नाय: तीर्थमान महर्जन व प्राडा. चुन्दा बज्राचार्य वंगु शनिवा: मंका: कथं सफुया विमोचन यानादीगु खः। थुगु सफू पाटन संयुक्त क्याम्पस

अन्तर्गत इतिहास तथा बौद्ध अध्ययन विभागया प्रमुख जुनु बासुकला रञ्जितकारं च्वयादीगु खः। वय्कलं थ्व स्वयां न्ह्य: भक्तपुरको पञ्चदान पर्व, धम्मदूत, चारुमति स्तुप व अनुमान दरवारका भित्तिचित्र सफू पिथनादीधुंकूगु दु।

स्थानीयपिनिगु

बिसं महानगरपालिकां थ:गु हैसियत कथं ज्या मया:गुलिं स्तर कुहां व:गु खँ धयादिल।

पुलांम्ह नगर प्रमुख शाक्य यँ महानगरपालिकाया वर्तमान प्रमुख बालेन्द्र साह न्वंवा:गु खँयात लक्षित यासँ धराहरा थना बीगु, सिंहदरबार च्याकेगु थेंज्या:गु आपत्तिजनक अभिव्यक्ति बियाच्चंगु खँय् आपत्ति नं प्वकादीगु दु।

लिसे वय्कलं प्रमुख साहं ज्या यायेगु थाय् वना: नं छुं ज्या मयाय्गु तर मेपित ब्व: बिया: उकिया जस थम्हं कायेगु यानाच्चंगु द्वपं बिसं थ: प्रमुख जुयाच्चनागु इलय् आपालं बांला:गु ज्या यानागु कारणं हे

सरकारं महानगरपालिकायात गुंगूगु हैसियतय् त:गु खँ धयादीगु दु।

न्हूसतकया फुटपाथ तब्या याय्गु योजना स्थानीय वासिन्दाया इच्छा धासं वय्कलं न्हूसतक फुटपाथ तब्या याय्त नगर प्रहरीया बल छ लया: जनप्रतिनिधियात ख्याय्त स्वयाच्चंगु द्व नं बियादीगु दु। लिसे वय्कलं नगर प्रमुख साहं जनप्रतिनिधियात सतकय् वय्त बाध्य यानाच्चंगु धासं धयादिल, ‘नगर प्रहरीया लिधंसाय् जुयाच्चंगु गण्डागदी सह याय्गु जुइ मखु।’ वय् कलं भावी पुस्तायात लय्ताय्केगु नितिं महानगरपालिकां म्हइगु करया सही सदुपयोग याय्मा:गु सुभाब नं बियादीगु दु।

सिद्धिचरण श्रेष्ठया १३० दै बुदिं हन



प्रधानमन्त्री केपी शर्मा ओली युगकवि सिद्धिचरण श्रेष्ठया कृतिपाखे थः तसकं प्रभावित जूगु धयादीगु दु । प्रधानमन्त्री ओली युगकवि सिद्धिचरण श्रेष्ठया १३० दै बुदिंया लसताय् जूगु ज्याइवल्य् सम्बोधन यासें युगकवि या कृतिपाखे क्रान्ति प्रज्वलित याःपिं ल्याय्महतयुग उदाहरण बियादिसें देय्या नितीं माःगु इलय् ल्याय्महत उत्साहित जुइगु स्वाभाविक खः धयादीगु दु । वय् कलं धयादिल, 'नेपाः-अंग्रेजी युद्धया इलय् गथे नेपाःमित उत्साहित जुल, उकथं हे माःगु इलय् जोश पिकाय्माः, ल्याय्महिपि चम्के जुइमाः ।'

प्रम ओली थः नं युगकवि सिद्धिचरणपाखे वैचारिक व साहित्यिक रुपं प्रभावित जूगु न्हयथसे धयादिल, 'वय्कः जिमि गुरु नं खः, जि वय्कः

पाखे तसकं प्रभावित जुयाच्चना', प्रम ओली न्हयःने धयादिल, 'वय्कलं च्वयादीगु म्येया प्रेरणां आपालं ल्याय्



महत क्रान्तिइ शहीद व शहीद जुइत तयार जुल ।'

गंगालाल श्रेष्ठयात नं वय्कःया म्येपाखे प्रभावित जुयाः सहिद जूगु

खः । जि नं क्रान्तिइ संलग्न जुया ।' प्रम ओली युगकवि या सिर्जनां आपालं च्वमिपिनिगु सिर्जनाय् प्रभाव लाकूगु धयादिगु दु ।

युगकवि सिद्धिचरण प्रतिष्ठानया ग्वसालय् जूगु ज्याइवल्य् प्रा.डा. उषा ठाकुरयात युगकवि सिद्धिचरण सिरपाः लिसें १ लाख नगद लःल्हाःगु खःसा नेपाल टेलिभिजनया नितीं ओखलढुंगा संवाददाता नवराज कार्कीयात युगकवि सिद्धिचरण युवा पत्रकारिता सिरपापाखे ४० हजार नगद लःल्हाःगु खः । उगु ज्याइवल्य् प्रधानमन्त्री

ओली प्रतिष्ठानपाखे पिथंगु 'युगकवि सिद्धिचरण गद्य कविता' व 'विज्ञान दृष्टिमा युगकवि' नांया निगू कृति सार्वजनिक यानादीगु खः ।

न्यू जेनिथया ओरिएन्टेशन ज्याइवः



लहना वाःपौ/यैया नांजाःगु न्यूजेनिथ इङ्गलिस मोडल स्कूलं थ्वहे श्रावण १८ गते शुक्रवाः ११ कक्षाया ब्वनेगु नितीं भर्ना जूपिं ब्वमि व अभिभावकपनि नितीं ओरिएन्टेशन ज्याइवः न्ह्याकूगु दु ।

ब्वनेकुथिया पुष्पलाल श्रेष्ठया सभापतित्वय् जूगु ज्याइवल्य् सभापति श्रेष्ठलिसे प्रिन्सिपल राजु महर्जनं मंकाःकथं त्वाःदेवाय् मत च्याकाः ओरिएन्टेशन ज्याइवःया उलेज्या यानादीगु खः ।

थुगु ज्याइवल्य् ब्वनेकुथिया स्यनामि रोशन थापां लसकुस यानादीगु खः सा स्यनामि विकास पौडेल व

प्रिन्सिपल राजु महर्जनं ब्वनेकुथिया नियम व २०८१ सालया ज्याइवःबारे कनादीगु खः ।

स्यनामि पिके न्ह्याकूगु ज्याइवल्य् थुगु शैक्षिक सत्रया नितीं भर्ना जूपिं ब्वनामिपिन्त खादा क्वखाय् काः ब्वनेकुथिइ लसकुस याःगु खः ।

न्यू जेनिथ इङ्गलिस मोडल स्कूलं यैया संस्थागत विद्यालय मध्ये सामाजिक ज्याखँय् नं न्हयज्यानाच्वंगु ब्वनेकुथि खःसा थुगु ब्वनेकुथिपाखे +२ पाखे व्यवस्थापन संकायपाखे होटल म्यानेजमेन्ट, कम्प्यूटर साइन्स व बिजनेस स्टडिजया अध्यापन न्ह्याका वयाच्वंगु दु ।

राष्ट्रिय अर्थतन्त्रमा योगदान बढाऔं

- स्थानीय स्रोत र साधन परिचालन गरी उत्पादन बढाऔं,
- आर्थिक रुपमा सक्षम बनौं, राष्ट्रिय पूँजी निर्माणमा योगदान पुऱ्याऔं,
- देखासिकी नगरौं, आफ्नो आर्थिक क्षमताको पहिचान गरौं,
- मितव्ययी बनौं, फजुल खर्च नगरौं,
- विलासिताका वस्तु तथा सेवाको अनावश्यक उपयोगलाई निरुत्साहित गरौं,
- अनावश्यक खर्च घटाएर बचत गर्ने बानीको विकास गरौं ।



नेपाल सरकार
विज्ञापन बोर्ड

नेपाः सकिपा सञ्जाल लिङ्गः बीगु हातुवा
हलिं नेपाः दब नेपाः देय् मूकवः (WNO Nepal Chapter) या न्हयब्वया

5. SQUARE ENTERPRISE presents

साउन २६ गते
रउजना हल्य

गाल्य वन

टिकटया मू ३००/-

विदेशक
संस्कृत संस्कृत

हुनः । सह विदेशक
संस्कृत संस्कृत (जी वा वा)

फर्पारः । संस्कृत
संस्कृत संस्कृत

दिव्यदिता
संस्कृत संस्कृत

दि. : ने. १५४८ सुलायक एकाद, वि. २०८१ साउन २६ गते बुधवार
वाय् : रउजना सिनेमा, काठमाडौं, ने. । टि. : गिर्जाया ३ ता.

टिकटया लिं लिं खासु : ८८१५०५८४७२, ८८१५०५८४७२
८८१५२२०२७७, ८८१५४२२२७२, ८८०१०२४२७२

छत्रपाटी निःशुल्क चिकित्सालय (अस्पताल)

"स्त्रीय शुलभ स्वास्थ्य सेवा सकसिया निती, असहायया निती जक निःशुल्क"

उपलब्ध सेवा

२४सै घण्टा सेवा

- इमरजेन्सी
- प्याथोलोजी
- एक्स रे
- ई सी जी
- औषधि पसल
- अन्तरंग सेवा

शल्यक्रिया

- मोडिबिन्
- स्तरन सर्जरी
- कक बान घाँटी सम्बन्ध
- हाडजोती तथा माया सम्बन्ध
- बिना बिरफार पिसाब लोकी घनर सम्बन्ध

बाहिरघर सेवा

- मुह रोग
- गेह रोग
- घुरीलोजी
- स्त्री रोग
- बाल रोग
- कथान्तर रोग
- बन्ध रोग
- अक्षि रोग
- अन्तरन मेडिसिन
- कर्ब तथा बीम रोग
- माकः काल घाँटी रोग
- अन्तरन हेल्वः खक अंग
- माइग्रीड
- मधुमेह

मेमेमू सेवा

- ट्रेसिङ
- इण्ट्रोस्कोपी
- कोलोनोस्कोपी
- फिनिबोथेरापी
- अन्तःमात्रा, कलर टुनर र टुको
- घुरीलो स्तरको घन रोगमाहा
- टिएम.टि. इन्टर

२४ घण्टा इमरजेन्सी सेवा

७०८ गंगालाल मार्ग, छत्रपाटी, काठमाडौं, फोनः ४२१६१३८, ४२५७९११, ४२६६२२९.